

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, den 12. Mee 2020

Här President,

sou wéi d'Chambersreglement et virgesäit, bieden ech lech, dës **dréngend** parlamentaresch Fro un d'Madamm Gesondheitsministesch an un den Här Minister fir sozial Sécherheet weiderzeleeden.

Am Prinzip war et bis elo esou, datt d'Betribler am Fall, wou en Ugestallte krank gouf, dësem d'Pai weider ausbezuelte hunn. Dëst Krankegeld kruten d'Betribler da vun der CNS rembourséiert.

Fir d'Betribler am Kader vun der COVID-19-Pandemie ze entlaaschten, bezilt d'Krankekeess d'Krankegeld awer elo direkt un déi betrafte Persounen. Laut mengen Informatiounen hält d'Krankekeess elo direkt 33 Prozent Steieren of, well si keng Steuerkaart vun dëse Persounen huet. Déi betrafte Leit kréien also eréischt d'nächst Joer, nodeems si hir Steuererklärung gemaach hunn, déi ze vill bezuelte Steieren erëm. Dëst trëfft virun allem déi Leit mat de klengen Revenuen, déi esou direkt een Drëttel vun hirer Pai ofgehale kréien. Vill vun deene Leit hu bis elo nach ni eng Steuererklärung brauchen ze maachen a mussen elo eventuell ee bezuelen, deen hinne se mécht.

An deem Kontext hätt ech folgend Froen un d'Regierung:

1. Kann d'Regierung déi uewe genannten Informatiounen confirméieren?
2. Wa jo, wéi eng Léisung proposéiert d'Regierung elo, fir datt déi betrafte Leit séier an onkomplizéiert dee volle Montant vum Krankegeld ausbezuelte kréien?
3. Wéi ginn déi Leit behandelt, déi am Abléck e Steierkredit ausbezuelte kréien?
4. A wéi engem zäitleche Kader kënnen déi betrafte Leit domat rechnen, datt si hier integral Pai bezuelte kréien?

Mat déiwem Respekt,



Jeff Engelen  
Deputéierten